

Nagina deducziun per geniturs che salvan a chasa l'uffant

■ (anr/vi) I resta tut sco fin qua. Deducziuns per pertgirar uffants pon far mo las famiglias che ston pajar per laschar pertgirar ils uffants. Il pievel ha refusà l'iniziativa da la pps che leva era la deducziun da taglia per famiglias che pertgiran sezzas la figlialanza. «L'entira discussiun da la finanziaziun ha dà la decisiun», di cusseglier naziunal *Martin Candinas* (pcd/GR) ch'è s'engaschà per il project da la pps. Damai ch'ins na savevia betg precis co che l'iniziativa vegnia realisada hajan ins gi starmet da memia grondas sperditas da taglia.

Nausch per la pps – bun per la pcd

Tut en tut n'è Candinas gnanca uschè trist che l'iniziativa è ida ier da la glatscha giu: «Ella fiss stada buna, ma nossas iniziativas èn anc meglras.» La pcd ha sin rucca gist dus projects: l'iniziativa per supplements d'uffants senza taglia e l'iniziativa cunter il chasti da la maridaglia. «Sut quest aspect na datti betg donn che l'iniziativa da la pps

è uss vegnida refusada», di Candinas. Ella avess uschiglio chaschunà sperditas da taglia, uschia ch'i fiss daventà pli grev da dumagnar atras las propostas da la pcd.

Che la pps haja pers la votaziun, haja era da far cun il maletg da la famiglia tradiziunala ch'ins haja collià cun l'iniziativa. «Oravant tut il messadi ch'i custia memia bler, ha terrà nossa iniziativa», di *Nadja Pieren* (pps/BE). La pressa ed ils adversaris hajan stigà e pretendì che las sperditas fis-san bler memia autas. «Nus vegnin a s'engaschar vinavant ch'il stadi na sa maschaidia betg en las famiglias e diceschia co che nus stuain pertgirar noss uffants.»

Ina midada tenor il gust da Widmer-Schlumpf

Per cussegliera federala *Eveline Widmer-Schlumpf* munta il «na» a l'iniziativa da la pps ina conferma da la taxaziun d'ozendi. Ils votants sajan s'exprimids per ina societad averta cun differents modells da famiglia. Ina midada da sistem tar la taglia da

famiglia – cun damain deducziuns e dapli supplements – sco quai che la cussegliera federala ha annunzià durant il cumbat da votaziun, saja pretensius. Era sch'in tal sistem fiss pli transparent saja quai grev da realisar ina midada. Widmer ha dentant annunzià sin l'onn proxim in rapport pertutgant questa dumonda ed alura possia la «gronda discussiun» cumenzar.

Sulet traits chantuns han ditg «gea»

Ils Grischuns han refusà l'iniziativa cun 29 454 cunter 37 304 vuschs.

Ditg «gea» cun procentualas da 51 fin 52 pertschient han sulet ils chantuns Appenzell Dadens, Sviz ed Uri. Uschia n'han gnanca tuttas regiuns champestras beneventà il project. En chantuns cun grondas citads è la refusa stada clera: Vad ha ditg «na» cun 67 pertschient, Genevra e Basilea cun 66 pertschient e Turitg cun 61 pertschient. A Berna han 58 pertschient dals votants ditg «na», en il Grischun radund 56 pertschient.



Ils Grischuns han refusà l'iniziativa da famiglias cun 29 454 cunter 37 304 vuschs.

KEYSTONE